



**Kamis, 10 Pebruari 2022**

*Ogen: 1 Tesalonika 2:7-10*



**Keleng Ate Orangtua**



**K**asih ibu kepada beta tak terhingga sepanjang masa, hanya memberi tak harap kembali bagai sang surya menyinari dunia. Syair lagu anak-anak si rusur endeken tupung wari ibu. Anak- anak ngendekensa alu dem semangat, aminna banci lenga iangkana bagesna erti lagu e tapi meriah akapna ngendekensa.

Paulus i bas renungenta enda erbahan andingen kerna kekelengenna man perpulungen Tesalonika desken keleng ate sekalak nande man anak-anakna. Sipemena, nande e melias. lalap iukurina ras ibahanna uga mehuli man anak-anakna, metami kal ia, ikuning-kuningina anak e gelah ula ngindet, iberekenna pangan si ergizi ras vitamin guna kesehaten anak e, itotokenna anakna e suari ras berngi. Sekali gia la bagi ukurna anakna, lalap lit pengalemi i bas ia nari. Nande la pernah erelem-elem man anakna. Sipeduaken, keriahenna ngasup mere man anak-anakna. Asa lit denga gegeh ras kengasupenna palapalaina lalap banci mere. Banci saja anak e enggo mapan secara ekonomi, tapi lit saja kin atena berekenna. Emaka erpala-pala nge ia erdahin gelah lit man bereknken man anak, sabab anak e kin buah barana. Berekenna rumahna, berekenna jumana, mobilna, bajuna, ras keperluan sidebanna. Riahen akapna mere asangken ngalo adi guna anakna. Sipelueluken, erdahin suari ras berngi gelah la jadi tanggungen anak-anakna. Erjuang kal nande gelah geluhna la jadi tanggunen anak-anakna. Ula min ia jadi sinanggal man anak-anakna. Nina Paulus bagi keleng ate nande e ka nge keleng ate kami nanangi perpulungen e.

Tuhu labo ersibar kekelengen orang tua man anakna. Asa umur geluhna ikelengina. Saja lit kepe balengna sabap erbaleng ka kegeluhenna. Bujur ninta man Tuhan simereken orang tua s idem kal keleng atena.